

- प्रदेश की सात विधानसभा सीटों में माथे ध्या उपचुनाव की मतगणना काल संवारे आठ बज्या ऊँ-रुझान अर नतीजा की जाणकारी देवण सारु खास इन्तजामात करी ज्या।
- राष्ट्रपति द्रौपदी मुर्मू विकसित भारत बणावण सारु जनता ऊँ राष्ट्र प्रथम रो नजरियो अपनावण बाबत् कह्यो।
- देशभर मांय 25 नवम्बर ऊँ सुरु कर्या जा रह्या विकसित भारत चैलेंज ऊँ एक करोड़ नौजवानां ने जोड़्या जावेला।
- उत्तर-पश्चिम रेलवे 48 खास गाड़ियां ने एक जनवरी 2025 ऊँ नियमित गाड़ियां रा तौर ऊँ चलावण रो फैसलो कीनो।

000

प्रदेश रा सात विधानसभा हलकां- झुंझुनू, रामगढ़, दौसा, देवली-उनियारा, खींवसर, सलूमबर अर चौरासी मांय उपचुनाव मांय पड़्या वोटों की काल गिणती करी जावेला। मुख्य निर्वाचन अधिकारी नवीन महाजन बतायो के गिणती संवारे 8 बज्यां सुरु करी जावेला। वे बतायो के 98 टेबलां माथे ईवीएम मांय पड़्या वोटों की गिणती करी जावेला जद के डाक मतपत्रों की गिणती सारु 39 टेबलां लगायी ज्यी है।

-----

मुख्य निर्वाचन अधिकारी बतायो के गिणती की ठौड़ों सीसी.टी.वी. कवरेज अर वीडियोग्राफी की व्यवस्था करी ज्यी है। मीडिया सेंटर मांय मोटी टी.वी. स्क्रीन माथे मतगणना रा रुझान अर नतीजा की जाणकारी दी जावेला। ई सागे ई मुख्य निर्वाचन अधिकारी रा दफ्तर की वेबसाइट अर निर्वाचन आयोग रा मोबाइल एप 'वोटर हेल्पलाइन' माथे ई गिणती रा रुझान अर नतीजा की जाणकारी करी जा सकेला। खींवसर विधानसभा हलका मांय पड़्या वोटों की गिणती नागौर रा लॉ कॉलेज मांय करी जावेला। ई सारु करीब 100 कर्मचारियों की ड्यूटी लगायी ज्यी है। चौरासी विधानसभा हलका की मतगणना डूंगरपुर रा श्रीभोगीलाल पंड्या राजकीय महाविद्यालय मांय व्हेला, जद के झुंझुनू की मतगणना शहर रा सेठ मोती लाल पी.जी. कॉलेज मांय करी जावेला। देवली-उनियारा विधानसभा सीट की मतगणना टोंक रा सरकारी पीजी कॉलेज मांय व्हेला। दौसा मांय वोटों की गिणती रे दौरान 700 सुरक्षाकर्मी तैनात कर्या जावेला।

000

राष्ट्रपति द्रौपदी मुर्मू विकसित भारत बणावण सारु जनता ऊँ राष्ट्र प्रथम रो नजरियो अपनावण की अपील कीनी है। वे आज हैदराबाद मांय राख्यी ज्या एक कार्यक्रम मांय बोल रही ही। श्रीमती मुर्मू कह्यो के सगळा ने देश की सांस्कृतिक अर बौद्धिक विरासत ने समझ र म्हाणी अनमोल परंपरावां ने और मजबूत बणावण चाहिजे। वे कह्यो के एका की भावना केई चुनौतियां रे बावजूद देश ने एकजुट राख्यो है।

-----

राष्ट्रपति कह्यो के भारत रो दर्शन दुनिया ने आदर्श जीवन मूल्यों रो उपहार दीनो है। वे कह्यो के म्हाणा दादा-परदादा की गौरवशाली परम्परा ने मजबूत करणो सगळा की जिम्मेदारी है।

000

उपराष्ट्रपति जगदीप धनखड़ काल जोधपुर पधारेला। वां रो जोधपुर रा अखिल भारतीय आयुर्विज्ञान संस्थान-एम्स मांय राष्ट्रीय आयुर्विज्ञान अकादमी रा 64 वां दीक्षांत समारोह मांय शिरकत करण रो कार्यक्रम है।

000

केन्द्रीय जलशक्ति राज्यमंत्री डॉ. राजभूषण चौधरी आज जैसलमेर मांय आकांक्षी जिला कार्यक्रम रा तैत कर्या जा रह्या कामां रो जायजो लीनो। वे आकांक्षी जिला रा न्यारा-न्यारा 5 हलकां रा 49 संकेतकां रा तैत काम ने संतोषजनक बतायो। डॉक्टर चौधरी स्वास्थ्य अर पौषण, शिक्षा, बुनियादी ढांचा विकास अर खेती-बाड़ी रा हलकां मांय जरूरतमंद लोगों ने फायदो दिरावण बाबत् कह्यो।

000

खान अर पेट्रोलियम विभाग रा प्रमुख सचिव टी. रविकान्त आज बाड़मेर जिला मांय नागाणा की मंगला प्रोसेसिंग टर्मिनल की न्यारी-न्यारी इकाइयां रो दौरा कीनो। ई मौके वे कह्यो के बाड़मेर तेल क्षेत्र पेट्रोलियम रा उत्पादन वाळा देश रा खास हलका मांय शामिल है, जठे ऊँ निकाळी ज्यो तेल प्रोसेस करण सारु देश की न्यारा-न्यारा तेल शोधन कारखानां मांय भेज्यो जावे है। इण ऊँ पैली श्री रविकान्त जालीपा मांय लिग्नाइट की खानां रो दौरा कर र जाणकारी लीनी। ई दौरान वे कह्यो के लिग्नाइट रो खनन जीरो लॉस तकनीक ऊँ कर्यो जावणो चाहिजे अर खान ऊँ निकाळती बगत माइनिंग सुरक्षा मानकां की पूरी पालना तैय करी जावणी चाहिजे।

000

विकसित भारत चैलेंज रो पहलो दौर 25 नवंबर 2024 ऊं 5 दिसंबर 2024 बीचे राष्ट्रव्यापी डिजिटल विजज रा तौर ऊं राख्यो जावेला। सवाल-जवाब री आ होड़माई भारत प्लेटफॉर्म माथे राख्यी जावेला। इण मांय 15 ऊं 29 साल ताई रा नौजवान सिरकत कर सकेला। भारतीय खेल प्राधिकरण, नेहरू युवा केंद्र अर राष्ट्रीय सेवा योजना री ओर ऊं आज जयपुर मांय राख्यी ज्यी प्रेसवार्ता मांय आ जाणकारी दीरीजी। चैलेंज रा दूजा दौर मांय निबंध अर ब्लॉग लेखन री होड़ां व्हेला जद के तीजा दौर मांय प्रतिभागी राजय स्तर मांथे चुणी ज्या मुददां माथे विचार बतावेला। चौथा अर आखिरी दौर मांय 11 अर 12 जनवरी 2025 ने नई दिल्ली रा भारत मंडपम मांय न्यारी-न्यारी राज्यां री टीमां राष्ट्रीय चैम्पियनशिप मांय सिरकत करेला।

नेहरू युवा केंद्र रा क्षेत्रीय निदेशक भुवनेश जैन बतायो के इण रो मकसद देश भर रा 15 ऊं 29 साल उम्र रा 1 करोड़ ऊं बत्ता नौजवानां ने जोड़नो है। वे बतायो के ओ चैलेंज भारत मंडपम मांय व्हेवण वाळा खास कार्यक्रम रो सुरुआती दौर व्हेला।

000

उत्तर पश्चिम रेलवे 1 जनवरी 2025 ऊं 48 स्पेशल रेलगाड़ियां ने नियमित रेल सेवा रा तौर ऊं चलावेला। मुख्य जनसम्पर्क अधिकारी कैप्टन शशि किरण बतायो के आं मांय दिल्ली, रेवाड़ी, हिसार, रोहतक, जींद, भिवानी अर उदयपुर सरीखा शहरां ने जोड़बा वाळी गाड़ियां शामिल है।

000

जयपुर-झुंझुनू बीचे बेगी ही एक और रेलगाड़ी सुरु करी जावेला। उत्तर पश्चिम रेलवे रा डीआरएम विकास पुरवार आ जाणकारी दीनी। वे आज झुंझुनू मांय अमृत स्टेशन योजना रा तैत काम रो जायजो लीनो अर जरूरी हुकम दीना। ई मौके खबरनवीसां सागे बातचीत करता थकां वे कह्यो के अमृत स्टेशन योजना रा तैत झुंझुनू स्टेशन माथे 10 करोड़ रुपया रा काम मंजूर करी ज्या है।

000

सी.बी.आई. सेंद्रल नारकोटिक्स ब्यूरो-चित्तौड़गढ़ रा इंस्पेक्टर अर वां रा दलाल ने तीन लाख रुपया री घूस लेवण रा आरोप मांय गिरफ्तार कीना है। आं लोगां माथे एक जणा रे खिलाफ दर्ज मामला रा निपटारा सारु मांय 20 लाख रुपया री घूस री मांग करण रो आरोप है। बाद मांय अ आरोपित 8 लाख रुपया री घूस मांगी। सीबीआई आरोपित इंस्पेक्टर कानी ऊं तीन लाख रुपया री घूस लेवण री बात मानबा पाछे वां ने अर वां रा दलाल ने पकड़ लीना। सीबीआई चित्तौड़गढ़ अर बीकानेर मांय आरोपित इंस्पेक्टर रा रहवास अर दफ्तर री ई तलाशी लीनी।

000

सूचना अर प्रसारण मंत्रालय रा केंद्रीय संचार ब्यूरो क्षेत्रीय कार्यालय, सिरोही री ओर ऊं सिरोही जिला रा शिवगंज मांय लगायी ज्यी दो दिन री विकसित भारत मल्टीमीडिया प्रदर्शनी आज पूरी व्हे गयी। केंद्रीय संचार ब्यूरो, सिरोही रा प्रभारी अधिकारी फूलचंद गहलोत प्रदर्शनी अर प्रधानमंत्री सूर्यधर मुफ्त बिजली योजना, प्रधानमंत्री उज्ज्वला योजना अर किसान सम्मान निधि योजना रा बारा मांय जाणकारी दीनी। कार्यक्रम रे दौरान पेंटिंग अर सवाल-जवाब री होड़ां जीतण वाळां ने ईनाम दिया ज्या।

000

प्रदेश मांय सर्दी रा बधता असर बीचे घणखर ठौड़ां पारो सामान्य ऊं नीचे चाल रह्यो है। आज सिरोही जिला रा माउंट आबू मांय न्यूनतम तापमान 5 डिग्री सेल्सियस रिकॉर्ड करी ज्यो। मैदानी हलका मांय सिरोही मांय सब ऊं कम 7 दशमलव 3 डिग्री सेल्सियस न्यूनतम तापमान दर्ज करी ज्यो। फतेहपुर मांय न्यूनतम तापमान 7 दशमलव 4, सीकर मांय 8, जालौर मांय 8 दशमलव 6, डबोक मांय 8 दशमलव 8, भीलवाडा मांय 9 दशमलव 2, चूरू मांय 9 दशमलव 3, चित्तौड़गढ़ मांय 9 दशमलव 4 अर अलवर मांय 10 डिग्री सेल्सियस न्यूनतम तापमान रिकॉर्ड करी ज्यो। मौसम विभाग प्रदेश रा उत्तराद हलकां मांय कठे-कठे धुंअर रहवण रा आसार जताया है।

000

वायु गुणवत्ता प्रबंधन आयोग दिल्ली अर राष्ट्रीय राजधानी हलका मांय अवधिपार जूनी गाड़ियां ज़ब्त करण सारु खास अभियान चलावण बाबत् कह्यो है। हवा मांय बधती गन्दगी ने ध्यान राखता थकां आयोग संबंधित राज्य सरकारां सागे ग्रेडेड रिस्पांस एक्शन प्लान ग्रेप ने लागू करण सारु समीक्षा बैठक कीनी। ई दौरान धूल बधावण वाळा सगळा कामां ने रोकण माथे खास ध्यान देवण बाबत् कही ज्यो। ई बीचे राज्य मांय ई सरकार बधता प्रदूषण ने काबू करण सारु जरूरी जतन सुरु कर दीना है। राज्य रा सगळा थानेदारां ने आप-आप रा हलका मांय पराली बाळबा ने रोकण सारु पाबंद करी ज्या है। अतिरिक्त पुलिस महानिदेशक दिनेश एम.एन. ई बारा मांय हुकम जारी कीना है। हुकम रे मुजब पराली बाळबा री सूरत मांय संबंधित थानेदार रे खिलाफ कार्यवाही करी जावेला। ई सागे ई जिला कलेक्टरां ने साखां रा बच्योड़ा हिस्सा खेत मांय ई बाळबो रोकण अर वां रा उचित प्रबंधन सारु उपखण्ड लेवल माथे समितियां बणावण बाबत कही ज्यो है। ई बीचे प्रदूषण नियंत्रण बोर्ड भिवाड़ी मांय बणायी-चुणायी रा सगळा कामां माथे रोक लगा दीनी है। खैरथल-तिजारा हलका मांय बधता वायु प्रदूषण ने ध्यान राखता थकां सरकारी अर गैर-सरकारी हलका री प्राइमरी स्कूलां काल ताई बंद राखण रा हुकम दिया ज्या है। अलवर मांय आज एक्यूआई 109 दर्ज करी ज्यो। ध्यानजोग है के लारला कुछ दिनां मांय प्रदेश रा केई शहरां री हवा मांय गन्दगी घणी बधी है।

000